

## **Dithero tsa Tirelano mo Kutlwanong**

02/2015 Thero ka Sontaga wa 02 mo sebakeng sa Adfente, e le ka 07. 12. 2014

### **Mo leineng la Modimo o e leng Rara le Morwa le Mowa o o Boitshepo!**

Lefoko le le okamelang beke eno lilotshiwe kuLuk. 21:28, le re: **"Inamologeng, lotsholetse ditlhogo, ka gonne kgololo ya lona e a atamela."**

1. Sefela sa 327 - 302/310

**2. Thapelo:** Modimo, Rara yo o mo legodimong, re fa pele ga sefatlhago sa gago le kajneo mo mosong go utlwa lefoko la gago. Morena, a ga se gore jaaka re fano go utlwa Lefoko la gago, o re abele Mowa o o Boitshepo wa gago, gore o re bolokele mo tumelong ya nnete gore re se ka ra latlhwa. Morena, o re thuse, re lebelele go bowa ga Morwao, re le mo tumelong, le go itshekisiwa mo maleong mo leineng la gagwe, re amogelwe mo botshelong jo bo sa khutleng jo re bo baakanyeditsweng ka loso le tsogo ya gagwe. Amen.

3. Lefoko la Testamente e ekgologolo le kwadilwe mo go Jesaya 63:15-19b. 64:1-3;  
Epistolo ka fa thulaganyong ya 2 e kwadilwe mo go Jakobo 5:7-8;  
Efangele ka fa thulaganyong ya 3 e kwadilwe mo go Matheo 24:1-14.

4. A go ipolelwe tumelo ya bokeresete!

5. Sefela sa 46 - 44/46

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Luka 21:25-33, e re: "'Foo go tla nna ditshupo mo letsatsing le mo ngwedding le mo dinaleding; le mo lefatsheng go tla nna tlaelelo ya merafe e le mo tharaanong, go le mesumo ya lewatile le makhubu a lone. Batho ba tla idibadiwa ke poifo le tebelelo ya dilo tse di tlang mo lefatsheng; gonne dithata tsa magodimo di tla reketlisiwa. Foo ba tla bona Morwa-Motho a tla ka leru ka thata le kgalalelo e kgolo. Mme e re tseo di simolola go dirafala, lo inamologe, lo tsholetse ditlhogo, ka gonne kgololo ya lona e a atamela.' A ba a ba bolelela setshwantsho a re: 'Bonang mofeie le ditlhare tsotlhe; fa lo di bona di setse di tlhoga, lo be lo itse ka losi gore selemo se setse se le gaufi. Le lona jalo, e re lo bona dilo tseo di dirafala, lo itse gore puso ya Modimo e gaufi. Ammaaruri ke lo raya ke re: Losika lo ga lo nke lo fela ka gope, dilo tsotlhe di ise di dirafale. Legodimo le tla feta le lefatshe, mme mafoko a me ga a nke a feta ka gope.'" Amen.

**8. Thero:** Phuthego e e rategang ya Morena wa rona Jesu Keresete, re mo debekeng tsa sebaka sa Adfente se e leng sebaka se phuthego ya Modimo e gopolang mo go sona kgorogo, e bong go tla ga Morena wa rona Jesu Keresete, le go gopola botsalo jwa gagwe kwa Bethlehem, le go gopola gore o sa ntse a tla mo go rona le kajeno ka lefoko le disakaramente tse di boitshepo tsa gagwe tse a re abelang boitshwarelo jwa maleo ka tsona.

Gape re gopola tsholofetso ya gagwe, fa a tla bowa ka letsatsi la bofelo go atlhola batshedi le baswi. Kajeno ke Sontaga wa 2 mo sebakeng sa Adfente. Ee, phuthego, mafoko a thero ya kajeno re a bona mo Efangeleng e e kwadilweng ke Luka. Ke Lefoko le le gopotsang phuthego go bowa ga Morena. **Ka moo letelang Morena Jesu, o tla bowa!**

1. Go bowa ga gagwe go tla etelelwa ke dikgagamatso.

2. Go bowa ga gagwe e tla nna kgololo ya rona.

1. Letelang Morena Jesu, o tla bowa. **Go bowa ga gagwe go tla etelelwa ke dikgagamatso.** Barategi mo Moreneng, Morena Jesu o tla bowa, ke se re se ipolelang mo kolobetsong ya rona, fa re kolobediwa. Ke se re se ipolelang mo tlhomamisong ya rona. Ke se re se ipolelang ka Disontaga tsotlhe mo boipolelong jwa tumelo ka mafoko a a reng: **"Kwa o tla bowang teng go atlhola batshedi le baswi."**

Phuthego, go ntse jalo. Morena o tla bowa. Ke gona go bodiwang gore bonala jang, fa go bowa ga gagwe go setse go le gaufi? Lefoko la thero ya kajeno le araba potso eo ka gore "Foo go tla nna ditshupo mo letsatsing le mo ngwedding le mo dinaleding; le mo lefatsheng go tla nna tlalelo ya merafe e le mo tharaanong, go le mesumo ya lewatle le makhubu a lone. Batho ba tla idibadiwa ke poifo le tebelelo ya dilo tse di tlang mo lefatsheng; gonne dithata tsa magodimo di tla reketlisiwa. Foo ba tla bona Morwa-Motho a tla ka leru ka thata le kgalalelo e kgolo."

Phuthego, lo rayang? A ga go a nna jalo? A ga re lemoge gore go bowa ga Morena go setse go le gaufi? A ga re ise re bone dikgagamatso tse di bonalang fa pele ga go bowa ga gagwe? Ke re: Re setse re bonye dingwe tsa tsona mo letsatsing, mo ngwedding, mo dinaleding; re setse re bonye tse dintsi tse di diragalang, e bong malwetse a a sa alafegeng, dintsho tse dintsi mo bathong, le mo gare ga ba bašwa, dintwa, go tsogelana ga mebuso, dithoromo tsa lefatshe, boikepo mo bakereseteng, tsotlhe tseo ke tshimologo ya ditlhabi.

Phuthego, go na le ba le bantsi ba ba iseng ba lemoge gore ditshupo tseo di supang? Lefoko le re: Go bowa ga Morena go etelelwa pele ke tsona. Ijoo mo go bone ba ba sa lemogeng, le go gana go di amogela! "Bonang mofeie le ditlhare tsotlhe; fa lo di bona di setse di tlhoga, lo be lo itse ka losi gore selemo se setse se le gaufi." A ga go a nna jalo? "Le lona jalo, e re lo bona dilo tseo di dirafala, lo itse gore puso ya Modimo e gaufi." Puso ya Modimo e teng kwa Efangele ya ga Keresete e rerelwang teng. Ka moo

2. Letelang Morena! Jesu o tla bowa. **Go bowa ga gagwe e tla nna kgololo ya rona.** Barategi, re setse re utlwile gore go bowa ga Morena go etelelwa ke dikgagamatso. Ke nnete rona badumedi re setse re di bonye. Jaanong fa re bona tsotlhe tseo di diragala, a re se ka ra boifa! Lefoko le re: "E re tseo di simolola go dirafala, lo inamologe, lo tsholetse ditlhogo, ka

gonne kgololo ya lona e a atamela.” Puso ya Modimo e setse e atametse. Phuthego, ke nnete! Re tla bona Morwa Motho a tla mo marung e na le thata le kgalalelo e kgolo.

Disang, lo lete! Morena o a bowa. Kgololo ya rona e setse e atametse. Barategi, letsatsi leo la go bowa ga Morena le tla nna boitumelo jo bogolo mo go rona ba re dumelang mo go ene, gonne go tla nna go setse go tlile kgololo ya rona, mme mo go bone ba ba sa dumelang mo go ene, le tla nna tlalelo e kgololo, gonne mo go bone go bowa ga Morena go tla nna go gorogile go atlholelwa tatlhago. Ke se se kwadilweng ke moporofeti Maleagi 4:1, se re: “Gonne bonang, letsatsi le e tla le le tukang jaaka leiso, mme botlhe ba ba ikgogomosang le ba ba dirang tsa boikepo ba tla nna dirite; letsatsi le le tlang le tla ba fisa, le sa ba tlogelele modi le e seng kala,” go bua MORENA wa masomosomo.

Badumedi, rona ba re dumelang, a re se ka ra boifa letsatsi leo, gonne kgololo ya rona e tla nna e setse e gorogile, ka fa moporofeti Maleagi a tswelelang ka teng ka mafoko mo go 4:2 a a reng: “Mme lona ba lo boifang leina la me, letsatsi la tshiamo le tla lo tlhabela, le na le kalafo mo diphukeng tsa lone, mme lo tla bolola, lo tlolaka jaaka dinamane tse di tswang mo sakeng.”

Bomowa-Rre, go ntse jang mo go rona? A re tla le bopelokgale jwa go ema fa pele ga Morena ka letsatsi leo? Re tla reng, fa re bona ditshupo tseo tse di tla diragalang ka letsatsi leo? Medumo e megolo le makhubu a lewatle ga di felelwe ke thata ya tsona, re boife, fa re leba tsotlhe tse di tlhagang mo lefatsheng, fa re bona dithata tsa legodimo di tshikinngwa mo go kalo?

Ijoo mo go lona ba lo sa iseng lo dumele mo go Jesu, fa e le Mopholosi wa lona! Tlhabologang, lo dumele, lo kolobediwe mo leineng la Modimo o o Borarobongwe! Ke fa le lona lo tla pholosiwa. Ee, phuthego, le rona ba re dumelang mo go Keresete, a re diseng, re lete, re rapele ka metlha, re kopane mo tirelong ya Modimo go utlwa Lefoko la Modimo ka Disontaga tsotlhe, re amogele mmele wa ga Keresete, re nwe madi a gagwe mo selalelong se se boitsheapo gore re itshwarelwe maleo. Ka nnete, a re tsholetsang ditlhago, gonne kgololo ya rona e atametse. Morena a re: “Le lona jalo, e re lo bona dilo tseo di dirafala, lo itse gore puso ya Modimo e gauifi. Ammaaruri ke lo raya ke re: Losika lo ga lo nke lo fela ka gope, dilo tsotlhe di ise di dirafale. Legodimo le tla feta le lefatsho, mme mafoko a me ga a nke a feta ka gope.”

Barategi, ke boammaaruri. Morena o tla bowa. Ga a bue maaka. Ga a ise a bue maaka. Lefoko la gagwe ke boammaaruri. O tiisa ka metlha, ka go bua gore “lefoko la me le le tswang mo molomong wa me le lone le tla nna jalo. Ga le kitla le boela kwa go nna le sa dira sepe, mme le tla dira tse di nkgatlhang; le tla fetsa tse di le di rometsweng.” Jes. 55:11.

Modimo, Rara wa rona yo o mo legodimong, a o re thuse rotlhe ba re phuthegetseng mo tirelong-Modimo eno kajeno, o re abele Mowa wa ona o o Boitshepo gore le rona re letele Morena Jesu, gore fa a tla bowa, a re fitlhele re le badumedi, le dibe tsa rona di itshwaretswe, re ithutile sentle ka ditshupo tse di etelelang go bowa ga gagwe gore re lemoge, fa a le gaufi, fa kgololo ya rona e setse e atametse. A re itumeleng, re thabe! Ke fa le rona re tla utlwa lefoko le le monate le le itumedisang, le le reng: "Tlaang lona, batshegofadiwa ba ga Rre, lo rue boswa jwa puso e lo e baakanyeditsweng e sa le ka tiholego ya lefatshe!" Teng koo re tla nna le Morena wa rona go ya bosenangbokhutlo. Amen.

**9. Thapelo:** Morena, Modimo, Rara yo o rategang yo o mo legodimong, re a leboga, re lebogela lefoko le le boitshepo la gago le re le utlwileng kajeno. Morena, ka re le utlwile, o re abele Mowa wa gago o o Boitshepo gore le rona re nne re letele ka metlha go bowa ga Morwao ka letsatsi la bofelo re le badumedi, o kopane le rona, o re goge, o re gorose mo botshelong jo bo sa feleng ka ene Morwao yo o rategang, Jesu Keresete, Mopholosi wa rona. Thapelo ya Morena: Rara wa rona yo o mo legodimong ...

10. Sefela sa 350 - 318/329

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke F. J. Mtshali, ka ngwaga wa 2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.